

# Pak Lah senang dijaga: Jeanne

BH-  
19/6/2007

**L**ONDON: "Keutamaan saya adalah untuk berada di sisi Datuk Seri dan menjaga beliau," kata isteri Perdana Menteri, Datin Seri Jeanne Abdullah.

Beliau, yang singgah di sini dalam perjalanan menemani Datuk Seri Abdullah Ahmad Badawi melakukan lawatan ke Russia mengaku kehidupannya banyak berubah selepas berkahwin dengan Perdana Menteri kira-kira dua minggu lalu.

"Kehidupan saya banyak sekali berubah tetapi tidak ada siapapun yang mengenakan apa-apa desakan pada diri saya. Peranan saya memang sudah berubah dan kini keutamaan saya adalah untuk berada di sisi suami, membantu dan menjaganya," kata Jeanne ketika beramah mesra dengan Perwakilan London di sini, kelmarin.

Majlis itu dianjurkan oleh isteri Pesuruhjaya Tinggi Malaysia ke United Kingdom, Datin Munah Razak serta ahli Perwakilan London terdiri daripada isteri diplomat dan pegawai Malaysia di sini. Kira-kira 40 ahli Perwakilan London hadir untuk berkenalan dan beramah mesra dengannya.

Jeanne yang nampak riang dan selesa dalam pertemuan pertamanya dengan anggota misi Malaysia di luar negara berkata, mengikuti lawatan 10 hari Perdana Menteri ke luar negara bermakna beliau berjauhan dengan dua anaknya Nadiah, 29 dan Nadene, 27.

"Kami bertiga begitu rapat dan selama 15 tahun hanya kami bertiga. Saya merindui mereka selalu, terutama sewaktu berpisah sebegini. Apabila saya membuat keputusan untuk mengahwini Datuk Seri, saya memanggil mereka untuk mendapatkan sokongan dan mereka memberi sokongan penuh kepada kami," katanya.

Sebagai seorang yang pernah menguruskan Kompleks Seri Perdana, Jeanne tahu keperluan Perdana Menteri dan tidak menghadapi banyak masalah dalam menjalani kehidupan barunya sebagai isteri Abdullah.

"Saya sudah lama menjaga Datuk Seri dan peranan saya kini berubah sedikit. Datuk Seri adalah seorang yang baik hati dan memang senang untuk menjaganya," kata Jeanne.

Beliau bagaimanapun mengelak soalan bagaimana Abdullah melamarnya: "Tentu sekali beliau tidak berlutut, tetapi biarlah itu kekal sebagai rahsia kami berdua," katanya sambil ketawa.

Daripada Zaharah Othman